



DECISIÓN DE NON SOMETER A AVALIACIÓN AMBIENTAL ESTRATÉXICA

Nome do plan: Plan especial director de ordenación e rehabilitación do Camiño Francés de Santiago (PE-3)

Órgano promotor: Concello de Santiago de Compostela

Expediente: 2014AAE1710

Código web: 1647/2014

ANTECEDENTES

1. O Plan xeral de ordenación municipal (PXOM) do Concello de Santiago de Compostela aprobouse definitivamente o día 03.10.2007. O PXOM sinala que o Camiño Francés de Santiago estará regulado polo PE-3 *Plan especial director de ordenación e rehabilitación do Camiño Francés de Santiago* e establece especificacións xerais ao respecto. Mediante Resolución do 02.07.2007, a anterior Dirección Xeral de Desenvolvemento Sostible declarou inviable someter o dito PXOM ao proceso de avaliación ambiental estratéxica (en diante AAE).
2. O día 16.06.2014 recibíuse nesta Consellería de Medio Ambiente, Territorio e Infraestruturas un escrito do director técnico da Área de Desenvolvemento Urbano e Sostible do Concello de Santiago de Compostela no que comunica o inicio da tramitación do “Plan especial de ordenación e rehabilitación do Camiño Francés de Santiago (PE-3)” e achega o correspondente documento de inicio para que se determine se debe someterse ou non ao procedemento de AAE.
3. Como paso previo a adoptar a decisión sobre o sometemento do Plan especial ao procedemento de AAE, o documento de inicio foi exposto ao público na páxina web desta Consellería por un prazo de vinte días naturais que finalizou o 08.07.2014. Ao mesmo tempo consultouse aos membros do Consello Galego de Medio Ambiente e Desenvolvemento Sostible e a outras administracións públicas.

CONSIDERACIÓNS LEGAIS

1. Lei 3/1996, do 10 de maio, de protección dos camiños de Santiago.
2. Decreto 247/2012, do 22 de novembro, polo que se aproba a delimitación do Camiño de Santiago, Camiño Francés, no Concello de Santiago de Compostela.
3. Decreto 154/2013, do 5 de setembro, polo que se aproba a delimitación dos tramos do Camiño de Santiago do Norte, Camiño Portugués, Ruta da Prata e Camiño de Fisterra ao seu paso polo termo municipal de Santiago de Compostela.
4. A Lei 2/2010, do 25 de marzo, de medidas urxentes de modificación da Lei 9/2002, do 30 de decembro, de ordenación urbanística e protección do medio rural de Galicia, integrou no procedemento de aprobación dos instrumentos de planeamento urbanístico o proceso de AAE previsto na Lei 9/2006, do 28 de abril, sobre avaliación dos efectos de determinados plans e programas no ambiente.
5. Os plans especiais deben ser obxecto de AAE cando así o decida o órgano ambiental en cada caso, agás que o planeamento xeral que desenvolvan fose sometido a avaliación ambiental (artigo 5.d da Lei 6/2007, do 11 de maio, de medidas urxentes en materia de ordenación do

territorio e do litoral de Galicia). A decisión deberá ser motivada, pública e axustada aos criterios establecidos no anexo II da Lei 9/2006 do 28 de abril.

6. A Secretaría Xeral de Calidade e Avaliación Ambiental é o órgano competente para a tramitación dos procedementos en materia de avaliación dos efectos de determinados plans e programas no ambiente, segundo sinala o Decreto 44/2012, do 19 de xaneiro, polo que se establece a estrutura orgánica da Consellería de Medio Ambiente, Territorio e Infraestruturas.

CONSIDERACIÓNS TÉCNICAS

1. Características do Plan

Obxecto: Protexer, mellorar e rehabilitar o Camiño Francés no Concello de Santiago.

Ámbito de actuación: Corresponde co ámbito¹ do ben de interese cultural (BIC) Camiño Francés no Concello de Santiago de Compostela, ampliado cun pequeno tramo do Camiño Norte de Santiago –dende a súa entrada no Concello ata que conecta co trazado do Camiño Francés en Lavacolla- e a área de solo rústico de protección forestal denominada PE-PR-3 “Plan especial desenvolvemento do sistema xeral de espazos libres e zonas verdes Monte do Gozo”.

Estableceráanse tamén determinacións sobre solos situados fóra do ámbito BIC pero que, pola súa transcendencia e potencial afección, deben regularse para a axeitada protección do Camiño.



Proposta: Elaborar un catálogo pormenorizado dos bens con especial valor cultural, natural, histórico, artístico, arqueolóxico ou etnográfico, e establecer as medidas necesarias para garantir a súa protección, conservación, recuperación e aproveitamento social e cultural. A alternativa proposta (modelo relacional) contempla varios tipos de determinacións e regulacións, entre eles os seguintes:

- Medidas para o acondicionamento físico do Camiño.
- Medidas de sinalización sistemática e homoxénea.
- Medidas de integración paisaxística.
- Determinacións para a ordenación dos núcleos rurais.
- Criterios e directrices para a ordenación e a regulación do territorio do ámbito de estudo.
- Medidas para a xestión do Plan, a coordinación administrativa e a participación da sociedade.

¹ Delimitado e aprobado polo Decreto 247/2012 do 22 de novembro.



2. Características ambientais da área probablemente afectada

O Concello de Santiago de Compostela está situado na zona centro da provincia da Coruña. O ámbito de actuación abrangue o territorio histórico declarado ben de interese cultural da ruta principal do Camiño de Santiago, o Camiño Francés, ao seu paso polo municipio. Existen no ámbito moitos e diversos elementos do patrimonio (arquitectónico, etnográfico, arqueolóxico,...) con valores que deben protexerse.

En conxunto trátase dunha zona antropizada e bastante transformada, nela insírense varios núcleos rurais e parte do entramado urbano da cidade de Santiago ao tempo que é atravesada por grandes infraestruturas de comunicación (aeroporto, ferrocarril, autovía A-54, autoestrada AP-9, corredor SC-20).

Non entanto, ao longo da traza do Camiño a contorna conserva certo grao de naturalidade e existen varias áreas con valor ambiental que merecen protección. Na documentación gráfica do documento de inicio identifícanse varias formacións vexetais para a valoración (formacións con especies autóctonas e formacións singulares) e propóñense 10 áreas de interese ambiental. As áreas de interese ambiental defínense como espazos ambientalmente atractivos obxecto da súa posta en valor para o gozo da natureza e da paisaxe; integran parte dos espazos catalogados no PE-3 que se aprobou inicialmente en maio do ano 2005 e dúas zonas de especial conservación² da Rede Natura 2000 (ZEC Río Tambre e ZEC Sistema fluvial Ulla-Deza).

O ámbito atravesa as concas hidrográficas do río Ulla e do río Tambre, atopándose na divisoria de augas destas dúas bacías. Son abundantes as zonas semiasolagadas, así como os ríos, regos e regatos que discorren polo ámbito. Ao abeiro do Real Decreto 903/2010, do 9 de xullo, de avaliación e xestión de riscos de inundación, nas proximidades do ámbito dúas áreas con risco potencial significativo de inundación (ARPSI): *Río Sarela* (ES014-CO-05-04-19) e *Río Sar* (ES014-CO-05-04-18).

3. Período de exposición pública e consultas do documento de inicio

Durante o período de consultas recibíuse un escrito do Servizo de Planificación da Paisaxe, dependente do Instituto de Estudos do Territorio, no que informa que con este plan especial agárdanse efectos positivos sobre a paisaxe.

Tamén o Servizo de Planificación e Programación Hidrolóxica, de Augas de Galicia, formulou algunhas observacións que a continuación se resumen (o texto íntegro remitírase ao órgano promotor):

- Identificación da rede fluvial. No ámbito deste plan atópanse varios ríos codificados no Plan hidrolóxico de Galicia-costa (PHGC). Débense identificar no plan todos os leitos e correntes naturais existentes, reflectindo na documentación gráfica e no texto das ordenanzas as zonas de protección. En todos os ríos sinalados, así como en calquera outro curso fluvial de menor entidade que discorra pola zona, serán de aplicación a normativa e lexislación de augas.
- Disponibilidade de recursos hídricos. No caso de ser necesario a utilización de recursos hídricos, deberase xustificar a orixe da auga coa que se vai abastecer e o volume do incremento de consumo previsto.
- Espazos naturais e zonas sensibles. No Rexistro de zonas protexidas do PHGC figuran varias zonas de captación de auga potable para consumo humano que poden verse afectadas polo

² Decreto 37/2014, do 27 de marzo, polo que se declaran zonas especiais de conservación os lugares de importancia comunitaria de Galicia e se aproba o Plan director da Rede Natura 2000 de Galicia (DOG núm.62 do 31.03.2014).



plan. Debérase avaliar a incidencia das actuacións propostas sobre os ecosistemas asociados a estas zonas protexidas.

- Mantemento dos obxectivos de calidade e medioambientais no medio receptor. Calquera actuación debe contemplar as solucións do saneamento propostas. Lembrar a prohibición expresa de realizar calquera vertido directo ou indirecto fóra da rede de saneamento municipal (no caso de que exista) agás autorización expresa da administración hidráulica.
- Incidencia das actuacións no réxime de correntes. No desenvolvemento das diferentes actuacións asociadas a este plan deberase xustificar a non incidencia da actuación no réxime de correntes, así como a non afección a terceiros como consecuencia da alteración das escorrentas que comportaría o cambio de uso proposto identificando as zonas con potencial risco de asolagamento. Destacar que no ámbito de actuación atópanse dúas áreas con risco potencial significativo de inundación (ARPSIs): *Río Sarela* (ES014-CO-05-04-19) e *Río Sar* (ES014-CO-05-04-18). A normativa do PHGC establece unha serie de prescricións que será preciso ter en conta (artigos 42 e 43).

4. Efectos ambientais previsibles

Con este plan especial preténdese protexer, mellorar e rehabilitar o Camiño Francés no Concello de Santiago de Compostela. O ámbito de actuación goza dun destacado e coñecido valor cultural e patrimonial, aínda que tamén posúe certos valores ambientais e paisaxísticos que se queren conservar e poñer en valor a través das medidas propostas no Plan, con previsibles efectos ambientais positivos.

Así pois, considerando as características do plan e as da área probablemente afectada, segundo os criterios establecidos no anexo II da Lei 9/2006 do 28 de abril, conclúese que non se agardan efectos ambientais adversos significativos.

Tendo en conta todo o indicado, ACORDO:

1. Non someter ao procedemento de avaliación ambiental estratéxica o *Plan de ordenación e rehabilitación do Camiño Francés de Santiago* (PE-3), no Concello de Santiago de Compostela.
2. Darlle publicidade a esta decisión no *Diario Oficial de Galicia* e na páxina web da avaliación ambiental estratéxica de plans e programas da Consellería de Medio Ambiente, Territorio e Infraestruturas (http://www.cmati.xunta.es/tema/c/Avaliacion_ambiental).
3. Notificarlle esta decisión ao órgano promotor.

Santiago de Compostela, 5 de agosto de 2014

Justo de Benito Basanta
Secretario Xeral de Calidade e Avaliación Ambiental